



Faasnacht 2015

Wenn i an Lasagne dängg, kunnt mir hit no s Gruuse.
Au s Fleisch vo däm Grischun, kunnt nach em Schlugge wiider uuse.
Do wird halt schaamloos glooge, jetzt froggt me konschterniert:
Isch d Wurscht vo dr Conchita ächtsch richtig degglariert?

Die Conchita Wurscht non grata, isch kai Wienerli, sondern e Cipolata!

D Fifa, die het s noonig dscheggt, waas jede Binggis waiss:
Die WM gheerti doch verlegt, in Katar isch es z haiss!
Bi de Taliban z Afghanistan, wurd e Bewäärbig no rentiere,
denn kennt sich deert nach jedem Foul, aine go rasiere.

Mi Soon, däa goot an d Faasnacht und macht deert drei Daag duure.
Fillt d Lampe, veeglet umenand, isch no am Fritig uff dr Schnuure.
Vo miir fasst är e Zämmeschiss, drufabe sait är stuur:
Hösch Bappe fir d Unesco isch daas jetze dängg Kultur.

Liebes Doggter Sommer Team, wie tu ich richtig schmuusen?
Meine Freundin, die wird nicht intim, ich glaub', es tut sie gruusen.
die wott sich nicht liieren, wurum hat si mich ächtsch satt?
Dange fir die Antwort, liebe Grüsse, Baasel Stadt.

Uff em Deggel vo mym Kaffiraam luegt mi däa druurig Hitler aa.
Y froggt mi, waas daas sell und weele Sinn denn daas sell haa.
Noch langem Iberleege isch die Wäärbig oportun,
wel mit sällem Kaffiraam wird mi Kaffi sicher bruun.

«Zehn kleine Negerlein», das daarfsch jo hit nimm' singe.
Au «wäär het Angscht vom schwarze Maa», sottisch nimme bringe.
Dr «Moorekopf» wird umbenamst, s Woort «Nääger» muesch vergässe.
Y bi bolytisch voll koräggt, aaber e Schwebbli darf i frässe.

*7 Mylliaarde 993 Myllioone lääbe uff däären Äärde.
Doo kaa s aim Angscht und Bang, jo richtig iibel wäärde.*

*Wäär het Angscht vom schwarze Maa?
Isch s wääge dr Hut oder wääge Ebola?*

Ussem Gellert, uus dr Breiti, waas gseet me? Halt däa Duurm!
Vom Joggeli, vom Bruederholz, waas gseet me? Halt däa Duurm!
Ussem Gundeli, vom Gotthälf, waas gseht me? Halt däa Duurm!
Vo dr Dalbe und vom Glyybi, waas gseet me? Halt däa Duurm!
Ussem Wettstai, vom Matthäus, waas gseet me? Halt däa Duurm!
Ussem Iseli, vom Santihans, vom Clara? Halt däa Duurm!
Die halb Stadt hoggt im Schatte, nur epper het doo gwunne:
Spaart sich soo s Solarium – und liggt uff s Dach an d Sunne.

*Dermit si dr Sunnebrand nit so duet drugge,
duet si sicher Jodtablette schlugge.*

Wenn d Schwoobe nit wänn biggle, denn straigge die no gäärn.
Nit ass mir wotte ziggle, doch so bliibe siin is fäärn.
Wie scheen wäär s, wenn dr Chef vo miir, daas ändlig wurdi raffe.
Nur laider muesch zem straigge, voorhäär zerscht mool schaffe.

Miir mainte, s wäär no geil, sie straiggte uff em Achter vo Weil.

My Noochbersbueb isch nit so häll, salli kaan är saage.
Me froggt sich, ob är iebe sell, zem ganzi Setz voordraage.
Miir mainte, s isch nit neetig, däa isch scho richtig poolt.
Scho däawääg het är s Nyywoo vom Schawinski iberhooht.

E Daame griegt e Selfie und findet s no dr Gipfel.
Druff dr Geri Müller, zämme mit sym Zipfel.
Mir versteend ass sii s duet gruuse, däa Dyp isch nit ganz dicht.
Sy Zipfel wäär jo gange, nur gseet men au sy Gsicht!

*Au bime Ziircher griegsch kai aaständig Selfie duure.
Am Schluss gseet me allewyyl numme syyni Schnuure.*